



Urgroßmudder.

Denk' ich so manchmol dodriver nooh,
Bun jugenduff, biß ich ald un groo
Wie alles iß gang un wie alles iß kumm,
Wie alles grad so e Gnn genumm,
Do will mer's ofd nedd in de Robb eneiⁿ
Un ich mähn nedd, daffes kennd meglich seiⁿ.
Ich sieh noch vor mer deß Heisje so kläⁿ,
Am Miehlegrawe die Weire schdehⁿ,
'm Miehhrad seiⁿ Ticktack un seiⁿ Geflabber,
'm Bächel seiⁿ Kausche un seiⁿ Geschlabber,
Am Wehr dann denn kläⁿne Wasserfall,
Die Scheier, de Schobb un de Hingelschdall,
Sinnerm Haus am Wißje die Regelbahⁿ,
Unser Blummegäördche glei newedraⁿ
Un zeh waggliche Schduuse enunner grad vorrem,
Do schbringd eich e Quellche aus Schdäⁿ un Borrem. —

Dord war ich geboore, dord war ich dehäm.
 Uffem Wißje unnig de Abbelbääm
 Do hann ich im Summer im Gras als geleh
 Un guck de Sunn un 'm Himmel endgeh.
 Am Quellsche hammer uns barfuuß gemachd,
 Im klaare Wasser uns als bedrachd.
 Un wammer im Feld uns un Wald verhurreld,
 Do hammer uns dord wirrer frisch gepurreld. —
 Du liewer Godd, wie lang isß deß schun,
 Un waß hadd nedd alles seiⁿ Enn dord gefunn.
 De Badder geschdorb un die Mudder dood,
 Die Brierer, die Schweschdere, so frisch un rood
 Die schloofen de ewige Schloof schun lang,
 Meiⁿ Alder isß aah eniwer gang,
 In deß Land, wo em nix mähⁿ queeld un frebbd,
 Un vun wo es käⁿ Wirrerlummes mähⁿ gebbd.
 So lew' ich bei meine Rinner dann
 Die aah wirrer grooße Grabbe schun hann,
 Verzehr meiⁿ paar Baze Ausgeding,
 Helf' in de Rich un de Haushalding
 Dagsdurch, so viel als ich helpe kann.
 Zwar schbier ich's selwer, es will nimmi gehⁿ,
 Zu ald sinn die Knoche, for sich fix se dreh',

Un vun all denne Behwehcher, Peze un Magge,
 Dhud em jere Dah e annereß blagge.
 Mer werd hald ald un sich selbschd zur Faschd,
 Un doch fiehl ich wie Kind mich faschd,
 So leicht un so froh, so frisch un so jung
 Wie heid morje, wie ich grad Grumbeere ringel,
 Die Hausdeehr gehd un die Schdumweklingel,
 Un 'm Bisje sei" Mann kummd erei" geschbrung.
 „Grooßmudder“, rufd er, „mer hann e Bu,
 Urgrooßmudder, ich gradulier dezu!“
 Urgrooßmudder? Wie sunnerbar!
 Wie e Schreck isses mer durch die Glirrer gefahr
 Un iwerin Grumbeerbuze un Alemme
 Bet ich: Jezd dhu mich zu der nemme,
 Herrgodd, ich hann genung gelebd,
 Un waß ich erreichd un waß ich erschdrebd,
 Un waß em im Lewe an Glick dhud begejne,
 Deß dhu jez d an dem klä" Kerlche sejne,
 Daß er lebd nor in deinem Geischd un Name,
 Jezd un in Ewigkeit! Ame!

